

DISSERTATIO INUSUALIS MEDICA,  
DE  
**PODAGRA**  
**JUNIORUM,**

QUAM  
AUSPICE DEO PROPITIO  
ET CONSENSU ATQUE AUCTORITATE  
GRATIOSÆ FACULTATIS MEDICÆ,  
IN ALMA REGIA FRIDERICIANA,  
PRÆSIDE

DN. D. MICHAELE ALBERTO  
POTENTISSIMI REGIS BORUSSIÆ CONSILIARIO  
AULICO, MEDICINÆ ET PHILOSOPHIÆ NATURALIS  
PROFESSORE PUBLICO ORDINARIO, ACADEM.  
CÆSAR. NAT. CURIOS. COLLEGA,  
FACULTATIS MEDICÆ DECANO SPECTATISSIMO  
DOMINO PATRONO, AC PROMOTORE SUO OMNI  
HONORIS CULTU PROSEQUENDO,

**PRO LICENTIA**

SUMMISQUE IN ARTE SALUTARI HONORIBUS, INSIGNI  
AC PRIVILEGIIS MORE MAJORUM SOLEMNI OBTINENDIS,  
HORIS LOCOQUE CONSUETIS,  
ANNO MDCCXXIII D. DEC.

PUBLICÆ AC PLACIDÆ ERUDITORUM VENTILATIONI SUBJICIET  
RESPONDENS

**JOHANN GEORG RICHTER**  
SORBIGA - MISNICUS,

HALÆ MAGDEBURGICÆ,

Typis JOANNIS CHRISTIANI HENDELII, Acad. Typogr









## PROOEMIUM.



Uanquam morbi vulgo pro confuso, turbulento, pernicioso, vitæ & sanitati opposito habeantur hominis statu, tamen attenta, judiciofa & à fœdis præjudiciis libera docimasi plurimorum morborum indolem à plebejo & triviali illo falso judicio liberabit, ut medico etiam sensu huc quadrare queat, *infirmitas non est ad mortem, sed ad gloriam dei Job. 4. v. 11.* Quemadmodum vero plurimi morbi destinatos suos habent fines, ita etiam multi illorum exacta sua habent tempora, ut ex illo argumento rite & condigne perspecto medicina omnino magnum possideat emolumentum, quo formalem morborum rationem penitus detegat & illustret: Hippocrati sane multum honoris debemus, quod morbos per ætatem discrepantes ex fida observatione indicaverit, neque huic veræ & sinceræ annotationi suas & forte quadantenus imperfectas & obscuras causales decisiones immiscuerit, sed verita-



tem facti bona antiqua fide proposuerit; cum sæpe in recentioribus ævis contingat, ut veritas facti cum falsitate causæ obscuretur, adeoque bonæ observationes cum splendidis theorematum commentis confundantur, ut exinde non nisi artificiosè mortificæ morborum tractationes medicæ, sive larvata & erudita homicidia aliquando emergere queant debeantque, cui adserto illud Celsi omnino favet, quod ille bene curet, qui bene cognoscit; & viceversa: sed quis propter hunc nævum utiles illas veterum observationes in eximium salubritatis vitæ animalis detrimentum falsis & sciolis illis contemplationum quicquiliis immerfas esse patiatur, ni & Deo & proximo & medicæ arti interesse judicet, quo veritatem suæ luci & integritati restituere & minus sobrias contemplationes repurgare adjuvet: Honori itaque ducimus Viro de Medicina meritissimo Excell. D. D. Stahlio, quod ex antiquitatis ruderibus utilissimam hanc observationem de morbis certis ætatibus propriis, suæ antiquæ veritati & sinceritati restituere & sobriis, solidis ac medicis usibus respondentibus causis illustrare magno & egregio allaboraverit studio: Sane ante hunc de veritate medica sollicitum propterea Clarissimum Virum nemo hanc observationem tanto judicii acumine & prospero successu illustravit; inde enim non solum genuini Morborum consensus inclarescunt, qui iterum in veritate facti fundati ac infallibiles sunt, sed & solida ac prudens causarum, vere medicarum, pendet connexio, ut haud necesse sit ad frivola quædam asyla confugere, sed



sed proximas, evidentes, sanas & homini apprime quadrantes causas attento & à præjudiciis repurgato animo concernere & applicare interfit: Quam parum enim ad ætatum morbos, sobria ratione explicandos, conferant nudi respectus physico-mechanici, aut ex nudis materiarum viribus, legibus, visibus, elateribus, potentiis, motricibus facultatibus, actionibus, reactionibus, impulsibus, nexibus, dependentiis, relationibus &c.: petiti, conquisiti, contorti & corrafi, vel ipsa superficiaria phænomenorum medicorum testatur contemplatio: Ex hoc enim fundamento notitiæ morborum, per ætates variantium, fluunt etiam veritates medicæ, quæ morborum consensum, consecutionem, reiterationem, congruam & incongruam indolem, ex parte etiam complicationem, subinde vero rationalem & formalem statum aperiunt ac designant: & si juxta *Hieronymum morbus* respectu individui aut subjecti, cui inhæret, *lapis lydius est, examinador virtutis, scrutador conscientie, excitador pœnitentis animi, monitor aternitatis*, ita sane de morbis ætatum prædicari potest, quod lapis lydius existant, examinador judicii practici, scrutador scientiæ medicæ, excitador negligentis animi, historiam & observationem medicam vel parvi pendentis, vel confuse & præjudiciose tractantis, monitor denique magis sollicitæ conciliationis, illustrationis & applicationis Historiæ morborum à veneranda antiquitate cum multo artis Medicæ emolumento commendatæ: Inter illos vero morbos, qui solennes & distinctas ætatum periodos servare solent,



est sane celebre illud Medicorum scandalum, videlicet Podagra, quæ cum in simplici & congrua sua qualitate tantas Medicis struat vexas, ut si non in thesi, sed in opere promiscue Podagram percurare integrum esset, vel solus Podagriater suo officio satis facere queat, ut pluribus intentus esse haud teneatur: sed dum simplex Podagræ status tantas Medico extroquet curas, quid non incongrua illius efficiat dispositio? Eminens hujus incongruæ invasionis character est, quando præmature ipsa homines corripit & ominosiores tragœdias ludit, ut propterea ipsi Medici de talibus Podagricis perquam sint solliciti: quid enim dicamus de Podagra Puerorum aliorumque junioris ætatis hominum, cum lippis atque tosoribus jam notum sit, quod hæc afflictio adultioribus magis congrua & adæquata sit; sed cum exempla non desint, quibus manifestum evadit, quod hic etiam morbus interdum anticipet, ita Medici omnino studium esse debet, quo non modo certitudinem facti, sive fidem historicam in hac observatione testetur, sed & ut veras & perspicuas hujus anticipationis causas indicet, quid ex hoc inverso & incongruo morbi processu expectandum metuendumve sit, significet & quibus auxiliis huic præcipitato affectui subvenire conveniat, commemoret; & dum nobis Inaugurali specimine selecta quædam consideratio medica commendanda & explicanda incumbit, ita de **PODAGRA JUNIORUM** brevibus differere proposuimus: Adsit nostris conatibus divina gratia, quo salutarem scopum gloriæ Dei impetrandæ & emolumenti proximi acquirendi assequantur.



**M**Orborum *differentiæ* multiplices quidem sunt, inter hæc vero illa etiam *eminens* & notatu digna est, qua alii morbi *juniores*, alii vicissim *seniores* corripere observantur homines, ubi tamen illa *ominosa* interdum occurrit *inversio*, ut quoad morbos senes *repuerascant*, pueri vero *senescant*, quæ *ætatum confusio*, uti omnibus quoad *diversas* circumstantias *suspecta* est, ita *medicis* perinde non aliter nisi *præjudiciosa* esse potest, eadem morborum vel *anticipatio*, vel *retardatio*: Prioris classis est *juniorum Podagra*, quæ à *primis* *Medicinæ ævis* non nisi *paradoxa* & *incongrua* fuit, ut propterea *Hippocrates* *sect. 6. aph. 30.* ex sua observatione significaverit, quod *pueri ante veneris usum non tententur podagra* & *Galenus* in hunc locum commentetur, *evnuchos vidimus quosdam podagricos laborantes, pueros autem non vidimus*; quam *Hippocratis* observationem etiam *Celsus lib. 4. c. 24.* proponit: *Hollerius* vero excipit illos, qui ex *hereditaria* dispositione podagram accipiunt & *Heurnius* propterea existimat, quasi per *contagium*, velut *venereum*, aut *instar* hujus infectionis, podagra per *hereditatem* communicetur, quoniam *Hippocrates* adseveravit, quod *ante veneris usum puer podagram non experiatur*, quæ ultima tamen argumentatio valde *infirma* & *vitiosa* est: *Waldschmidi* in *Diff. de Cura lælis Podagricorum Solatio* dicit *cap. 1.* *Hippocratis nostri* *effata* - - *hodierno tempore veritate exciderunt*: dum *luxuries puerorum & mulierum Hippocratem fecit mendacem*; quibus *motus Gordonius* in suo *lilio medicinæ particularis* in hæc erumpit verba: *Summatim aliter vadit negotium, quia & evnuchi & mulieres & omnis sexus & omnis ætas propter malum regimen podagrizant.* *conf. Schenk* *Obs. Medicin. Lib. 5. de Arthritide obs. 1.* Podagram nonnunquam populariter *grasari* & contra *divini Hippocratis sententiam*, etiam *pueros*,  
evnu-



*eunuchos, virgines & mulieres ea corripit: ita præcedentibus testimoniis applaudit Sydenhamius in tract. de Podagra Opp. p. m. 459. non quod Podagra eos solum adoriatur qui crasso & corpulento habitu donantur, cum aliquando etiam etsi rarius, graciles & macilentos invadat: neque quod hic morbus in omnibus senium præstoletur, quandoque enim etiam ætate florentes corripit, quoties scilicet infelicia semina à parentibus, quasi ex traduce acceperint &c. ita varii probatissimi viri Podagram in junioribus subjectis annotarunt, velut veritas hujus observationis ex consequentibus magis inclarescet: quod vero secundum Hippocratis sensum pueri non corripiantur podagra ante veneris usum, iterum justa interpretatione indiget, ne hic affectus tantum venereo exercitio adscribatur, siquidem à nimia quidem venere podagram provenire demonstrarunt Glissonius Anatom. Hepat. cap. 45. p. 502. Warlitzius de Morb. bibl. cap. 12. p. 373. Liberatus de Liberat. Podagr. Politic. lib. 1. c. 5. lib. 2. c. 7. Cliftonus Wintringham. tr. de Podagra. Melchior Friccus Icon. Podagr. p. 75. 195. Bierlingius Thesaur. Theoret. Pr. Cas. 25. Schurigius Spermatolog. cap. 9. qu. 7. p. 448. seq. Baglivus, Sydenhamius, Sennertus, Waldschmidius & multi alii; proinde tamen exempla constant, quod homines casti & ab omni venere abstemii nihilo minus Podagræ cruciatibus obnoxii fuerint, unde Hippocratis observatio aliqua limitatione & interpretatione indiget.*

## §. II.

Quando itaque de juniorum Podagra hoc loco nobis sermo est, tunc præsupponimus quod Podagra magis consistenti, virili & senili ætati propria sit & quod legitime intra quadragesimum & quinquagesimum ætatis annum invadere soleat subjecta; juniorum Podagra vero illa est, quæ à vigesimo ætatis anno homines corripit, graviterque postea affligit: de hac Podagra dicit Baglivus Opp. Prax. Med. lib. 2. p. m. 193. quod pueris sunt exanthemata, juvenibus hæ-



*morrhagiæ, idem sunt senili ætati articularum dolores, quibus supervenientibus à magnis morbis liberant senes: hinc vulgi dictærium innotuit: quod Podagra post quadragesimum annum invadens, longævitatē, ante illum verò corripuens, brevitatē vitæ designet: ipse Hippocrates, licet de pueris dixerit, quod ante veneris usum Podagra non corripiantur, tamen Lib. II. Prædict. §. 15. differentiam inter Podagricos seniores & juniores constituit: & licet junioribus hic affectus adeo congruus & familiaris haud sit, tamen illius observationis exempla etiam non sunt incognita in Praxi medica: quod vero Podagram infantum attinet, tunc hoc loco verba Illustr. Stahlii è Disp. de Podagræ nova Pathologia inferere & commendare lubet p. 10. 11. quæ enim observationes de infantibus podagricis allegantur, inter rariores connumerandæ sunt & laborant suspitione certitudinis: cum quemlibet Rheumatismum, aut similes affectus a febris male solutis, a scabiosis inquinamentis retropulsis, a perfrigerationibus & particulari transpirationis defectu, imo interdum a distorsione, lapsu in coxas, ab epilepticis concussionibus &c. subnatas, pro Podagra interpretari, nostri non sit propositi: conf. Sydenhamius Opp. p. m. 465. interea observatores talia specimina Podagricorum infantum proferunt: conf. Salmuthus de Podagra in puella octenni Cent. 3. obs. 53. de Arthritide puerorum & infantum A. N. C. dec. 1. an. 8. obs. 12. Bonetus Medic. Septentr. lib. 6. sect. 3. obs. 22. ita dicit Paschalius in Method. curand. lib. 1. cap. 16. Vidi quod Hipp. & Galenus non viderunt, nobilem videlicet puerum, septem aut octo annos natum, Vallesium, laborantem non tantum podagra, sed arthritide vere & ædumno, cui non fuit hæreditarius morbus articularis, & satis ille biliosus erat: Dum itaque secundum Sydenhamium, Baglivum & Stahlium Podagra affectus adultioribus & senectuti propioribus, aut senibus magis familiaris est, ita vicissim Juniorum Podagra præmaturus, præcipitatus, immoderatus & valde irregularis est affectus, qui gravioribus periculis, quam*



*legitima* Podagra subiectus existit, id quo pluribus inferius significandum erit.

§ III.

Quod itaque *Historiam* Podagræ in *junioribus* attinet, tunc *generalem* illius *Historiam* pro *fundamento* præsentis observationis ponimus, quam e prælaudatis Viris, videlicet *Sydenhamio*, *Baglivo* & *Stahlio* commendamus; illa tantum hoc loco proponemus, quæ ad *specialem* illum respectum, quatenus hæc Podagra in *junioribus* occurrit, pertinent: quod enim *Baglivus Lib.1. de calculo & Podagra* dixit, quod plures *divites & sapientes*, quam *pauperes & fatuos* podagra interficiat, quod *vinum, venus, otium & crapula* sint primi parentes podagræ, idem etiam ad præsentem observationem applicari potest: quales circumstantias satis eleganter & judiciose illustrat *Casp. Rejesius Camp. Elys. juc. quest 88. cui titulus: an à lauta & opipara mensa in simplicem, frugalem ac pauperculum victum mutatio podagram curare valeat?* ubi hic author n. 12. dicit: optat podagra bene edere, vestiri commode, habitare late, cubare molliter, dormire satis, laborare nil & recreationibus vacare perpetuis; hinc ad divites cito convolat, à quibus non nisi acerbius tractata refugit: de hisce valet quod *Plato lib.3. de Republ.* professus, tales sunt somnolenti, segnes, ignavi, vertiginosi & in Podagræ domicilium apprime idonei: ob id ab antiquioribus *Arthritis & Podagra Dea Misopthocos* nuncupata constat, quasi odio habens pauperes, cum sit *Bachi & Veneris* filia, dicit *Rejes. l. c. n. 8.* proinde vero de subiectis *junioribus*, quæ Podagra corripuntur, dicit prælaudatus *Celeb. Stahlius diss. de Podagra p. II. qui sinceriori podagra, adhuc juniores afficiuntur, ab aliquot supra viginti annis ad triginta, illi vel hæreditaria dispositione præparati observantur: vel hæmorrhoidibus ante illud tempus manifesto tentati fuerunt, simulque communiter animi vel admodum iracundi, vel gravibus terroribus perculsi, vel denique dieta vinosa, vel spiritu*

*vinosa*



*vinoso gaudentes, deprehenduntur.* Quando itaque secundum prædictas animadversiones in *junioribus* subjectis *speciales* & singulares illas qualitates perlustramus, quæ in tali *præmatura* Podagræ invasione concurrunt, tunc ex parte huc valet, quod *Nathan. Lacy* in *tr. de Podagra* dixit, quod *Podagra nemini, nisi volenti injuriam faciat: conf. Act. Erud. Lipsiens. An 1694. Mens. Sept. p. 331.* quod videlicet illi, qui bonis consiliis auscultare recusant & irregulari vitæ addicti manent, etiam hisce *podagricis* cruciatibus submittantur: hinc *observatio* medica docet, quomodo *juniora* talia subjecta, ante Podagræ insultum negligentiori vitæ dediti fuerint, eximios excessus in victu & potu commiserint, *crapula* indulserint, *spirituosa* ultra modulum & proportionem ætatis, temperamenti, sensibilitatis & consuetudinis suæ ingesserint, inordinatis & immoderatis animi corporisque actionibus operam dederint, castitatem & puritatem vitæ & corporis valde violaverint, denique aliquando *proclivitatem* affectuum spasmodicorum ex hereditate in se susceperint.

#### §. IV.

In Historica *Juniorum* Podagræ explicatione præter prædictas circumstantias, *subjecta* præcipue concernentes, adhuc *seorsim* notamus, quod hic affectus in junioribus admodum cum *hypochondriacis* afflictionibus conspiret, id quod satis solide annotavit *Excell. Stablius* in *Pathol. Med. p. 1369.* & meretur proinde aliqualem attentionem *B. Wedelii* in *Am. Mat. Med. p. 65.* animadversio, quod *Podagricos* etiam *hypochondriacos* esse adseveret, ubi quidem nos aliquo modo quoad *veritatem facti* consentientes, quoad *respectum causæ* tamen dissentientes habet: Et ita *juniores* podagrici facilius præter reliquas suas *externas* vexas etiam *internas* afflictiones *Spasmodicas* experiuntur, unde *Baglivus* *Lib. 2. Opp. p. m. 192.* differit: *admirandus quidam ac fere occultus est consensus inter articulos & intestina, quarum*



*partium morbi vicissim commutantur* : ita enim experientia docet, quod præter podagricos dolores frequentius in abdomine modo *colicæ*, modo *hypechondriacæ*, modo *nephriticæ* afflictiones, concurrant, aliquando præcurrant, interdum etiam alternent, præsentemque morbum tanto magis *ominosum*, *confusum* & in *periculosas palindromes* pronum reddant : Sunt insuper juniorum podagricorum dolores *ardentiores*, *vehementiores*, magis inquieti & exorbitantes, proclives in *arthritica Vaga* pathemata, faciles in concursus *febriles*, *orgasmos* sanguinis & *femi inflammatorias*, *rheumaticas*, *erysipelatodeas* pedum afflictiones: plurima proinde pathemata non modo *insolentiora* & *impetuosiora*, sed & magis *confusa* & *fugacia* existunt: ob id *præsentis* motus *spasmodici gradu* auctiores, imo quandoque à *convulsivis* motibus non penitus alieni existunt: superveniunt *periculosiores* obstructions *alvi* & *urinae*, cum *interno suspecto ardore*, *dolore*, *siti* & *majori inquietudinis gradu*; quidquod aliquando *irregulare* *schemata febris* vel *quotidianæ continuæ*, vel *cholericæ* vel *ephemeræ* *quotidianæ* & *plurium dierum* coincidit: *intercurrunt varia molimina hæmorrhagica*, modo *caput*, modo *hæmorrhoidalialoca* infestantia: alternant alii *spasmi* & quidem affectus *arthritici*, *hemicranici*, *rheumatici*, *nephritici* & *erysepelacei* cum *spasmis* conjuncti in aliis regionibus; concurrunt aliquando *cordis palpitationes* & *angustie præcordiales* *insolitæ*; *venæ inflantur* & *ardor suspectus* in illis *persentiscitur*: singuli dolores ad *sensum* sunt *acutiores*, interim *fugaces*, neque diu in *uno loco* subsistentes: proinde præter hanc *fugacem spasmorum tragoediam* facile *inflammatorie*, *congestoriae* & *febriles commotiones* coincidunt & alternant, ut propterea hæc juniorum *Podagra* haud procul à *prosapia acutorum morborum* existat.



§ V.

Antequam vero ejusmodi Podagricus affectus juniora subiecta corripit, *præcedunt* ut plurimum variæ *anomalæ* commotiones *hæmorrhagica*, præmaturæ *Erysipelaceæ* afflictiones, frequentes *rheumatodæ* calamitates, in junioribus ætatibus præcipitatæ *arthriticæ* vexæ, in infanti periodo insoliti *epileptici* insultus, in quibusdam aliis subiectis inopportunæ & obscuræ *tractiones* in *arthriticam* indolem abeuntes, in aliis inexpectata & præmatura *calculi* præludia & hinc pendentes afflictiones, *urinæ* excretionem comitantes, aut *alvinam* exonerationem stipantes; modo coincidunt tensesmi, modo *ardores*, modo *pruritus* in exitu ani, modo *protuberantiæ* suspectæ in locis *hæmorrhoidalibus* emergentes, modo *pollutiones nocturnæ*, modo suspectæ spermatis expressiones sub duriori alvi exoneratione concurrentes, modo *stranguriæ* valde molestæ: Quando vero jam *perfecte* tales Podagrici cruciatus subiecta juniora corripunt, tunc interdum *cholericæ* affectus coincidunt, velut vomitus & alvi fluxus biliosi; proinde hi juniorum *dolores* podagrici *repente* sua subiecta invadunt, *subitoque* ad *vehementem* suum gradum pertingunt & hac ratione *semi acutam* suam qualitatem denuo produnt, cum vicissim *seniorum* Podagra *segniorem* invasionem & progressum servare soleat. *Pulsus* in hac juniorum podagrica calamitate præter suam durtiæ & fortitudinem magis in *febrilem* qualitatem *accelerationis* & *frequentiæ* inclinatur: Ipsi vero insultus podagrici in tali juniori ætate non modo quacunque sua *recursione* acerbiores & graviores evadunt, sed & *frequentius* contingunt & *leviores* causas sequuntur, ut propterea ejusmodi subiecta maxima *sollicitudine* sibi moderari teneantur, ne ex ullo errore & excessu huic præjudicioso & periculoso Podagræ recursui ansam præbeant: *Urina* juniorum podagricorum & *saturatior* & *rubicundior* est, quidquod *concretiones salinas* crystallinas rubicundas copiosiores continet



& deponit: usitatius etiam cum hoc affectu podagrico *nephritici* simplices videlicet inflammatorii, congestorii & *spasmodici* renum morbi concurrunt: non minus *juniores* podagrici, qui simul eminentius *hypochochriaci* sunt, acerbiores *vomitibus*, graviores *cardialgias* & intercurrentia *abstinentia* flatulenta experiuntur: compatitur subinde diversis *morbidarum* afflictionum speciebus ferme *totum* corpus podagricorum juniorum, dum *spasmi* præsentes magis de *vaga* indole participant: unde *capitis* dolores sensibiliores mox concurrunt, mox oppressiones *pectoris*, mox *aliarum* regionum in corpore *dolorificæ* sensationes occurrunt: quid quod hi podagrici dolores sæpe cum aliorum locorum doloribus *spasmodicis alternant*.

§. VI.

Et has quidem *speciales* circumstantias in *Historica* juniorum podagricorum explicatione recensere placuit, posteaquam reliquas Podagræ proprias, *essentiales* & familiares qualitates è *generali* illius Historia conciliandas, hoc vero loco minime repetendas, comendaverimus: Proximum nunc erit, ut illa quæ ad *Prognosin* præsentis observationis pertinent, subjungamus: in præcedentibus indicatum fuit, quod qui in *juniore* ætate diu hoc affectu corripuntur, rarius ad *longævitatē* pertingant, id quod suo suffragio testatur Excell. D. D. Stablius *disp. de autocrat. Naturæ* p. 26. *de Motu Hæmorrhoidum internarum* p. 18. 19. *de Podagra* p. 17. 18. *Patholog. med.* p. 1369. 1372. 1373. Martinus Pansa in *consil. antipodagrico*, Helius Eubanus in *Ludo de Podagra*, Jul. Cæs. Claudinus in *Consil. de Podagr. & Gonagra* Præterea sciendum quod, *juniorum* Podagra facile cum *funestis* & perniciosis *metastasis* nobiliores & interiores partes invadat, hinc in internas *inflammationes*, hepatis, intestinorum, ventriculi, vesicæ urinariæ, renum &c.: convertitur, aut in *colicam convulsivam* mutatur, aut in periculosas viscerum nobiliorum *obstructiones* transformatur, aut



aut in vomitum cruentum, singultum lethalem, parapneumoni-  
den, apoplexiam, paralyfin, lienteriam, fluxum hepaticum,  
febres acutissimas inflammatorias, hecticam præcipitis fune-  
sti exitus, aut cum acuto typo colludentem, icterum cum acu-  
ta febre stipatum, gangrænam & sphacelum internum trans-  
figuratur: *conf. Stahlus de Podagra p. 18. & Patholog. med. p.*  
*1369. 1370.* Juniorum Podagra facilius in *acutos*, quam chro-  
nicos morbos delabitur: quo citius cruciatus podagræ cess-  
sant, eo magis suspectus est subjectorum status, quoniam  
præceptum hæc conversio ut plurimum impetuosa & in nobilio-  
ribus regionibus & visceribus magis perniciofa est: quan-  
do juniorum podagra ab hereditate prævia dependet, fe-  
rè immedicabile non modo constituit malum, ut Rhumè-  
lius tradidit, sed & magis acceleratas infert consecutiones  
perniciosas: communiter omnis juniorum hominum po-  
dagra nunquam periculo vacat, sed facilius, certius & citi-  
us in graviora & funestiora pathemata delabitur: eo peri-  
culosior etiam est status in podagræ junioribus, qui simul  
plethorici sunt & ante hac vel actualibus Hæmorrhagiis vel  
confusis moliminibus hæmorrhagicis obnoxii fuerunt: quo  
magis inordinatæ & immoderatæ vitæ dediti fuerunt tales po-  
dagræ, eo turbulentior & intricatior hujus affectus status  
existit: uti plethorici, ita eminentius sanguinei & cholericæ  
podagræ juniores magis subitaneis periculis expositi sunt:  
quo magis juniorum podagra vagis cum symptomatibus  
stipata est, eo citius in funestum exitum degenerat: quo  
magis immoderati, luxuriosi, inordinati & intemperantes ta-  
les sunt podagræ, eo citius & certius infausus irruit exi-  
tus: quo frequentius in junioribus subjectis insultus poda-  
græ revertuntur, eo certius perniciosus eventus metuendus  
est: ut plurimum hujus podagræ retropulsio est funesta: quan-  
do vero vel exquisitè ordinatæ vitæ operam dant tales po-  
dagræ, vel legitimum Hæmorrhoidum fluxum experiun-  
tur, tunc paulo facilius adspirante divina gratia à prædictis  
malis



*malis præfagiis immunes sunt, quo plus vero medicaminum ingerunt, tanto magis è diversa medendi methodo provenientes, eo citius sinistre negotium decurrit: quando hæc podagra è genere vivendi exacte pravo & qualificato nata est, tunc eo minor spes impetrandæ liberationis & restitutionis facienda est.*

§. VII.

Quando post historicam Podagræ juniorum commendationem nunc causas probatas, & genuinas recensere debemus, quæ hanc anticipationem & præmaturam Podagræ invasionem accersunt, tunc omnium primo merito hereditariam communicationem motuum spasmodicorum in genere indicare debemus, sicut Sydenhamius in tract. de Podagra Opp. p. m. 465. eloquitur: *neque pueros, neque juvenibus minores Podagra vera atque genuina vexatos hæcenus observavi: nonnulli tamen mihi noti sunt, qui priusquam eam ætatem attigissent, levissimam aliquam quasi velitationem præsenferant: quorum nempe Patres etiam tunc hoc morbo tenebantur, cum iis generandis operam darent: & Hollerius in comment. ad aphor. 30. Hipp. Sect. 6. dicit: vidimus natos tantum decem annos laborasse: tempore Hippocratis pueri non conflictabantur podagra ante usum veneris: nunc vero conflictantur, fortasse quia contraxerunt morbum à parentibus; & Excell. Stahlius disp. de Podagra p. 12. profitetur: hereditaria dispositio obtingit infantibus, quando à parentibus generantur, qui maxime isto tempore, quo hos progignunt, ejusmodi affectibus laborant, qui plurimum in motibus ac intentionibus movendi, consistunt: qui talium motuum, intentionum, impressionum, tacita memoria imbutus est infans, ille variis succedentibus temporibus, varios podagricorum motuum prodromos sentit, nempe per frequentes & impetuosas hæmorrhagias narium, dolores dentium, molestas sensationes in artubus, Spasmodum, Epilepsiam in prima pueritia, Erysipelata &c.: mature & sæpe tolerat & experitur. conf. Ejusdem Theoria medicæ vera p. 1389. 1392.*

porro



porro podagræ hæreditariæ in juvene 25. ann. mentionem facit vir laudatus in *disput de hæreditaria dispositione ad varios affectus* §. 45. alia exempla Podagræ hæreditariæ occurrunt in *Ferem. Lossii disp. de arthridite, Beyer Philon. pharmaceut. lib. 6. Schneideri tr. de Catarrhis* p. 658. 685. 686. Quænam vero genuina ratio Podagræ per hæreditatem communicatæ sit, solide explicavit *Celeberr. D. D Stablius in Pathol. med. p. 1389. seq.* paucis hoc loco indicamus, quod culpa non sit quærenda in *materia*, videlicet in communicato tali *seminio contagioso* materiali, quæ licet *trivialis* sit adfertio, tamen multis modis à vera ratione dissonat: ut ut enim *contagiosam* agnoscant & commemorent Podagram *A. N. C. dec. 1. an. 7. obs. 143. an. 10. obs. 44. Cent. 1. p. 192. in app.* tamen per parentis semen podagræ contagium communicari in embryonem & non in *conjugem* fœminam, proinde hoc contagium ex semine sese *seorsim* separare, (cum materia seminis ad formationem fœtus *proxime non* pertineat,) porro idem contagium *tamdiu otiosum* delitescere in nato infante, donec denique affectus erumpat, theoria *extreme imaginaria* est, & nullo solido (si *refugia & asyla figmenti & otiosi* suppositi omitantur) nititur argumento: Nos paucis indicamus, quod per hanc hæreditatem communicentur *ideæ* specialibus *moliminibus hæmorrhagicis* & motibus *spasmodicis* cum hæmorrhagiis quadrantibus, respondentes & cohærentes, quæ in nato infante, quamprimum aliquo modo *corpus* ad congruam *firmitatem* transit qua tales motuum species facile exerceri possunt, *præmaturo* quodam ausu applicantur; quare in ejusmodi subjectis *accelerate & immoderate*, irregulares tamen commotiones & *eluctationes* sanguinis occurrunt: seorsim vero in plurimis illis juvenilibus insultibus & cruciatibus podagricis adsunt *connata molimina hæmorrhoidalia*, ob eandem hæreditariam communicationem *præmature & fati-*

C

tis



tis *confuse* scævientia; qui ipse *perversus* status in culpa est, quo minus *facile*, *legitime* & *sufficienter* hæmorrhoides erumpant & decurrant, unde tota hujus hæreditariæ Podagræ facies *inordinata* & *turbulenta* est, quæ & *excessivis* & *perversis* motuum processibus & decursibus nititur.

### §. VIII.

Memori fane mente tenenda est hæc exquisitè practica observatio, quod *juniores* Podagrici ut plurimum tales *evagantes conatus*, hæmorrhoidales experiantur, ob id etiam *hypochondriacis* insultibus obnoxii sunt, sicut hoc malum *hypochondriacum* perinde cum motibus hæmorrhoidalibus consentire solet, *conf. Dissp. Illustris D. D. Stahlii de Vena Portæ Porta malorum, de Motu Hæmorrhoidum internarum, de Malo hypochondriaco-hysterico & meus tr. de Hæmorrhoidibus, Dissp. de Hæmorrhoidibus Medicina hypochondriacorum*: exinde etiam facile liquet, cur *palindrome* & *retrocessio* Podagræ, ut plurimum illas regiones & partes invadat, in quibus *hypochondriacum* malum tragœdiam suam ludere solet, sicut in præcedentibus ex *Baglivo* similem connexionem Podagræ cum morbis *intestinorum* produximus, quem consensum non satis solide partium aut nervorum consensui adscribere possumus, ni ex illo generis nervosi consensu aliquod *asylum* constituere malimus: neque quidem desunt inter medicos testimonia de hæmorrhoidibus hæreditariis, quarum mentionem faciunt, prælaudatus *Stahlius in Scriptis* allegatis, nec non *Rolfinkius in Epit. lib. 3. c. 21. Schenckius lib. 3. de hæmorrh. Solenander lib. 4. conf. 20. Hammerus in Viridar. Historiarum c. 6. p. 94. Ettmüllerus Part. 1. ubi de hæmorrh. agit. Scholiographus ad lib. 1. c. 55. Hollerii de morb. intern. Franckenau de hæmorrh. Beyer Philon. Pharmaceut. lib. 4. c. 29. app. 5.* quibus ipsis testimoniis ad minimum *in thesi* & paucis verbis consensum Podagræ, Hæmorrhoidum & hypochondriaci mali, tam in simplici



*plici* suo statu quam ex *hereditaria* qualitate provenienti-  
um & consideratorum indicare lubuit: neque etiam defi-  
ciunt exempla, quibus de hac observatione *dubitantibus*  
ad *crassior* sensum demonstrare licet, quomodo in ejus-  
modi junioribus Podagricis *evidentiora* molimina *hæmor-*  
*rhoidalia* se prodiderunt, dum vel *ante* Podagræ invasio-  
nem, vel *sub* illius *repetito* decursu, modo *imperfectæ eru-*  
*ptiones sanguinolentæ* hæmorrhoidales, modo *subordinatæ*  
& *vicariæ albicantes* mucilaginosæ excretiones hæmorrhoi-  
dales, modo *protuberantiæ* in *locis* hæmorrhoidalibus, mo-  
do *serpiginosæ* etiam efflorescentiæ tum in *iisdem* locis, tum  
in *vicinia* occurrerunt, cujus demonstrationis exacte *pra-*  
*dicæ* varia specimina in *casibus* clinicis allegare possemus,  
ni *brevitatis* studium nobis propositum sit: cur vero non  
in *omnibus* junioribus podagricis *tale* quid eveniat, adeo  
*rigorose* postulari propterea non potest, quia motuum hæ-  
morrhoidalium *evagationes multiplices* sunt, ut pro *diversi-*  
*tate individuorum*, morum, temperamentorum aliarumque  
concurrentium causarum, etiam *anomalie* hæmorrhoida-  
les discrepent: *frigidum* vero erit argumentum, ex *illa* ra-  
tione podagricis talibus abnegare velle vel *connatam* vel  
*adscititiam* & *adventitiam dispositionem* ad negotium hæmor-  
hoidale, quia *proximiores* & *evidentiores* tales apparatus hæ-  
morrhoidales non *ubique* eveniunt, siquidem illis, quibus se-  
positis aliis *præjudiciis vera* indoles *Motuum* hæmorrhoida-  
lium & hypochondriacorum perspecta est, non modo *nul-*  
*la* solida ratio *dubitandi* superest, sed & solida potius suc-  
currunt & adstant *argumenta*, quibus *contrarias* opinio-  
nes facile evellere & *enervare* possunt.

§. IX.

Præterea ad hanc *præmaturam* Podagræ invasionem  
efficacissime contribuit multifaria *intemperantia*, vel in *u-*  
*no* individuo *concurans*, vel frequentius *recurrens*: ubi  
tamen minime existimandum est, quasi ab illis causis, velut



per aliquam *vim & necessitatem* ad Podagram rapiantur, qui alias *nulla* ratione in eandem *inclinant*: sed, si etiam illa præcedens causa *hæreditariæ* communicationis *defecerit*, nihilominus ex ratione *temperamenti*, adeoque *morum & habitus* corporis, ut & ratione *diætæ*, *educationis*, *vitæ generis* &c. tales causæ concurrunt, quæ omnino ad prodagricam hanc invasionem *disponunt*: ita tales homines sunt animi *alacrioris* & in varia illius *pathemata*, maxime operosa & *impetuosæ*, magis *proni*, subinde humorum *abundantia* evidenti pollent, dum ex *diætâ plena & lauta* corpus magis magisque humoribus onerant & accumulunt, insuper ex *diætæ* causis & *erroribus* frequentibus, *alvi & urinæ* alterationibus obnoxii deprehenduntur, non minus ex *spirituosorum* ingestione & immoderata *corporis* exercitatione variis *perversis & vagis* humorum commotionibus, *acrioris* feri generationibus & coacervationibus subiecti sunt, denique ex *libidinoso* animi affectu, *genitalium* partium frequenti irritamento, *indeque* conciliato copioso & immoderato *affluxu* humorum in *easdem & alias* ex lege *motus progressivi* sanguinis consentientes partes *irregularibus* illis connexis conatibus *excretoriis* ex *inferioribus* corporis regionibus expositi redduntur, cum quibus singulis causis illa *præmatura* Podagræ offensio & invasio connectit: *Seorsim* vero sciendum quod *intemperantia* in *Diætâ* ad hanc *anticipationem* Podagræ eximie contribuat, quando homines *junioris ætatis*, *excitatoris* animi, *floridioris* habitus & *abundantioris* sanguinis ex ingestis *spirituosis & copiosis*, ex repetita *crapula*, *impetuosis & confusis* humorum commotionibus ansam præbent, ut futura *hæmorrhoidalis* destinatio *præmaturo* tali *irregulâri* podagræ *schemate* irruat, dum præcipue sub *priori inordinatâ* diætâ unâ *viæ urinariæ* eximie *stimulantur*, sicuti huic considerationi pathologicæ lucem affundit doctrina de *consensu* Podagræ, *Hæmorrhoidum & calculi tractatu* D. D. Præsidis de *Hæmorrhoidibus* concilianda: hinc præ-



prædictus Cliftonus Wintringha in tr. de Podagra hanc juniorum Podagram intemperantiæ & præmaturæ veneri adscribit: & cum illa *intemperantia* communiter in *comitatu* cum libidinosa & *incaſta* vita conſiſtat, ita ut ſecundum commune dictærium *Bachus* & *Venus* in uno individuo cooperentur, hinc *præmatura* & *immodica* veneris exercitatio omnino ad *præcipitatam* & *incongruam* hanc Podagram diſponit, dum non modo in genere præſens ſanguis *ſuperfluus*, ſub hoc *æſtro* venereo *orgaſticâ* inturgeſcentiâ valde commove-  
tur, ſed & ſub hoc *impetu* in inferiores *genitales* & *conſanguineas* alias partes invitatur, ut concurrens *conatus* ſanguinem adeo *ſuperfluum* & moleſtum *excretorius* tam in *præmatura* molimina *hæmorrhoidalia*, quam in *connexas* anomalias ſpasmoticas *hypochoſdriaco - nephritico - colico - iſchiadico - podagricas* tranſeat. Præter has hætenus commemoratas cauſas multum denique contribuunt, concurrentes *affectus animi*, præcipue *iracundi*, qui *ſimplici* ſua efficacia graves, *impetuoſas* & ſimul *vagabundas* commotiones in fluidis & ſolidis corporis partibus excitant, proinde ſub *commercio* reliquarum prædictarum cauſarum ad tales *præcipites* *anomalos* & præmaturos affectus *arthritico - podagricos* diſponunt; Ubi adhuc reminifci lubet illorum ingeſtorum imprimis *potulentorum*, quæ de copioſo *vapoſoſo* minusve *temperato ſulphureo* principio participant, quo nomine vina *recentia* & certarum provinciarum ſimilia *potulenta* *vinofa* designanda ſunt, in quibus ſecundum *triviale* opinionem medicam, magis *acidum* illud fixum & crudum *tartareum*, quod quidem nullis *orgaſticis* commotionibus excitandis quadrat accuſatur, licet contra de *talibus* vinis ſatis ſuperque cognitum ſit, quod *confuſis* *maſſæ ſanguineæ* *orgaſmis* provocandis certius quadrent: ut ita *nulla ſolida* ratio affulgeat, qua in podagræ theoria ſal aliquod inimicum pro *principali* cauſa



producere debeamus; id quod fusius demonstravit D. D.  
*Præses in Schediasmate de Podagra sine sale.*

§. X.

Dum itaque Podagra juniorum non modo tota sua indole præcipitata, immoderata & valde vagabunda est, sed & subiecta, quæ hac Podagra laborant, quoad animum valde agilia, sensibilia & inquieta existunt, ut & causæ, quæ hanc Podagram alliciunt, valde efficaces, intricatæ, præcipientes, fonticæ & manifestæ sunt, ita sane ipsa hæc Podagra minime securis nititur fundamentis atque successibus, sed propter ipsius juventutis præsentis impatientiam, inquietudinem, fugacitatem, inconstantiam & vehementem reluctantiæ periculosis metaschematismis subiecta est: Ob id non modo cum tali Podagra varii alii morbi, ordinariè huc non quadrantes, ut Rheumatismi, Arthritides vagæ, acres & acutæ Congestiones inflammatoriæ comminationes & febriles commotiones coincidunt, aut alii perversi spasmi, vel plane in extremum transeuntes motus Convulsivi concurrunt, aut cum eadem Podagra confuse, attamen immoderate alternant, sed & vel sponte vel ex levi interna pathetica causa, vel vitio in regimine & diætâ, tanto magis vero ex mala medicatione evenit, ut hæc adeo qualificata Podagra antiqua loca facilè deferat & in alias, vel remotas vel proximas vel internas vel externas, tanto magis nobiles & sensibiles regiones & partes præcipiti & periculosa vehementia decumbat: quemadmodum etiam juniorum hominum actiones turbatæ facilius in alia excedentia motuum vitia degenerant, ita affectus ex hac Podagra, qualitercunque offensa, suborientes in acutos, vehementes & præcipientes alios morbos, maxime sanguineos, delabuntur, quæ prava censectaria cum subsectorum ætate, temperamento, morbo prægresso adventitiis moribus incontinentiæ & impatientiæ nimix conspirant: sic etiam perquam notorium est, quomodo juniores Podagrici, sub hisce cruciatibus & doloribus maxime inquieti, quasi furibundi, extreme impatientien-



tientes & perversissimis moribus instructi sunt, ut *ob hanc* pravam, reluctantem & *immorigeram* indolem, non modo de *præsenti* malum exasperetur, sed & *novis* *deterioribus* qualitatibus augeatur & ad *periculosiores* immutationes subeundas disponatur, siquidem *in hoc* etiam malo sese *consensus* *morum* cum *morbis* comprobatur: & dum *junioribus* subjectis *acuti* morbi *familiariores* existunt, ita *spasmodici* affectus ex *tantis* causis geniti, non modo *per se* in *acutam* magis indolem inclinant, sed & *metamorphoses* ex ejusmodi affectu defultantes *eo magis acute* redduntur, quo non solum motuum *excessiva* vitia, sed & *floridior* & *turgidior* status corporis contri-  
tribuunt: Et hæc argumenta ad *Pathologicam* præsentis observationis explicationem spectantia sufficiant.

§. XI.

Supereft ut aliquas observationes *Præcticas*, huic the-  
mati quadrantes, subnectamus; *Curam* quidem Podagræ hoc loco non promittimus, quæ vero in *juniorum* Podagra quoad medendi methodum annotanda sunt, brevibus indicabimus: *Quæcunque* itaque in *adultiorum* Podagra *omit-  
tenda* & fugienda sunt, illa *majori* sollicitudine etiam in *juni-  
orum* Podagra evitare decet: Præcipue quidem omnia sub-  
jecta, quæ *internas* partes valde *stimulant*, quocunque de-  
mum modo & effectu alio connexo operentur, excludenda sunt, siquidem talem *stimulum* repente Podagra *sequitur* & *genuina* sua loca *deferendo* cum periculoso & funesto impe-  
tu *internas* partes invadit, adeo, ut intra *paucos* dies com-  
muniter eventus ille tristis *letiferæ* Podagræ *retrocessionis* excipiat: Tanto minus vero hæc sensibilis *juniorum* Po-  
dagra *experimenta* admittit, siquidem alia *probata* remedia nihilominus magna cum *circumspectione* & sub *exquisita* me-  
thodo applicare convenit: omnia remedia quæ secundum medicorum stylum *calida* vocantur, in hoc affectu *sepo-  
nantur*, quoniam facile non modo *præsentem* morbi statum *exacerbant*, sed & *complicationes* *febrilium*, *inflammatoriorum*,  
rheu-



*rheumaticorum & acrius congestiorum affectuum invitant; neque quidem Opiata & efficacius sedativa secure in hoc affectu ordinare licet, quoniam illorum usum, confusissimi & maxime corrupti affectus sequuntur, ad quorum censum etiam paralytici, lethargici & apoplectici morbi referri merentur, unde varia testantur observationum specimina, uti post talium remediorum oblationem repentina mors, consecuta fuit: Neque etiam sic dicta refrigerantia in hoc affectu locum inveniunt, quæ facile valde suspectam cum necessariarum excretionum, tum nobilium viscerum obstructionem periculosissimam causantur: Exulant subinde adstringentia: Excidunt etiam commendationem valde emollientia & quæcunque alia motuum vitalium ordinem facile offendere possunt: Tanto magis omnia concentrata spirituosæ, acria, subtiliora resinosa, sulphurea in hoc affectu fugere convenit: Quæ omnia motibus præsentibus podagricis, qui jam per se in excessum proni sunt, exasperandis satisfaciunt. Quod vero Topica quæ vulgo in Podagræ cura collaudantur, attinet, tunc & illa in præsentī affectu, provide seligenda & commendanda sunt; præcipue quidem sciendum, quod volatilia & sulphurata non facile hisce junioribus ægrotantibus admitti debeant: Neque etiam rubefacientia hic locum inveniunt, quoniam acceleratam inflammationem causantur: Quidquod camphorata pruden-ter ordinare convenit, ne repentina discussione inopinatos pravos effectus, post se trahant: Emplastica acriora sensibilis juniorum cutis, quæ repentinis congestionibus subiecta est, ægre perfert: unguinosa aliaque fortius emollientia suspectis humorum stasibus in pedibus ansam præbent: Quæcunque denique sensibilius adstringunt & facilius repellunt, sedulo seponere & omittere convenit.*

§. XII.

Sed ne in nudis cautelis proponendis diutius hæreamus, paucis adhuc positiva decisione medico-practica aliqua  
secura



secura commendabimus auxilia, quæ in *præsenti* statu adhiberi possunt; *interne* quidem temperata *Lenientia*, lacticia, gelatinosa, emulsiva, præmissis generalibus *præparantibus*, conducunt. Deinde sic dicta *temperantia* & mitiora *diuretica* & *diaphoretica* adhibere licet è priorum classe, videlicet salina *tartarisata*, *Nitrosa* & alia solubilia salia media, ubi non penitus spiritum nitri dulcem, aut acidum vitrioli dulcificatum rejicimus: habent præterea *temperata acidule*, aliquando plane cum lacte combinatæ, laudabilem utilitatem: *Selecta* sedativa prædictis vel conjungenda vel interponenda sunt; è quorum numero cinnabarim, extractum chaccarillæ & florum chamomillæ officinalium seorsim commendamus: Porro decocta & infusa calida è speciebus lenientibus & simul leniter diureticis & diaphoreticis parata, æque in hoc statu proficiunt; Cavendum tamen est, ne valde *saturata* talia decocta propinemus: *Extrinsecus* vero magis *secca*, quam humida, admitti possunt, ubi species temperatæ *nervine* & *discutientes* commixtæ conducunt; inter illas vero flores Chamomillæ vulgaris, Sambuci, acaciarum, lavendulæ, stœchados arabicæ, spicæ, una cum aliis remixti, huc quadrant: *Camphoræ* usus *modicus* æque commendari meretur: *Vegetabilia* in hac Podagra aliis palmam præripiunt: *Suffimigia* & *Fomenta* vaporosa ex prædictis & aliis speciebus, tam *lenientibus*, quam *resolventibus* temperatis similem laudem merentur: Providus usus præservatorius *Balneorum*, cum *temperatis* aquis *subterraneis*, *præparato* prius corpore, æque conducit; in *defectu* vero harum aquarum, *inseffus* ex vegetabilibus, ante nominatis, substitui possunt: subinde temperatus usus *Balnei coriariorum* non penitus rejici potest, quod aliàs in Podagra & arthritide commendari solet, in A. N. C. Dec. 1. anno 7. obs. 229. Quid quod usus moderatus *vina- ceorum*, quem alias Borellus cent. 2. obs. 42. & Gùldenkleee libr.



V. epist. 7. laudant, in hac Podagra exoptatam suam efficaciam non derogat, omnium maxime vero hisce ægrotantibus temperata *dieta* suadenda est, uti illis insuper commendari licet solamen Caroli Quinti Gedult und ein wenig schreyen, sind die besten Arzeneyen. Huc quadrat quod Petrarcha part. 2. Dialog. 84. profert, *si salutem cupis aut pauper sis oportet, aut ut pauper vivas, porro: patientia in adversis efficacissimum atque optimum & sæpe unicum remedii genus est*: Proinde eleganter Podagræ curam per temperantiam describit Rejes. l. c. no. 10. quando enim ita afflictii juniores Podagræ *optima* ingerunt pharmaca & tamen antiquam vitæ genus continuant, tunc parum solaminis ipsis superest: Præcipue etiam in potus usu maxime temperari studere debent, sicut Borellus cent. IV. obs. 11. curam Podagræ per abstinentioniam à potu describit, quæ quidem haud ita promiscue pro imitatione seligi poterit: Præterea hæc temperantia sese præcipue ad *animum* extendit, ut lenitati, continentia, tranquillitati studere debeant tales Podagræ, & licet Bartholinus cent. VI. histor. 28. Podagricis iram utilem deprædicet, tamen raro multis hæc medicina utilis erit; rectius *animi delectatio*, temperata & amica conversatio hisce subjectis concedenda erit, sicut Seneca Epistola 28 profitetur. *Nil æque ægrum reficit atque adjuvat quam amicorum affectus*. Hisce consiliis si juniores Podagræ obtemperaverint, Deo benedicente afflictionis suæ securiorem lenitionem & mitigationem impetrabunt. Et hæc placuit hac vice de *præsenti* themate brevibus differere: Deo humillimas referentes gratias, quod huic proposito annuere voluerit; cui etiam hæc meditationes, ut illas perpetua sua benedictione comitetur, devotissime consecramus.